

摘藻堂四庫全書薈要

集部

欽定四庫全書薈要

集部

御選明詩卷九十九

詳校官原任主事臣李斯咏

欽定四庫全書薈要卷一萬八千五百九十九

集部

御選明詩卷九十九

五言絕句四

沈倬

月夜

明月吐夜光
寒影在溪水
山人抱琴來
坐久秋雲起

花溪客舍

孤燈坐來昏
淒其不成宿
夜鶴忽驚棲
翻飛入修竹



汪時元

九日舟中

秋風葉正飛江上逢重九
人世幾登高寂寞黃花酒

袁景休

入慧慶寺

新秋入古寺涼氣何清越
樹杪夕陽微山蟬鳴不歇

春日過南城

黃鳥當三月村南景正繁
桃花千萬樹不異武陵源

自江村望虎丘

茲山奇且麗，迥與江村合。
幽人去復來，斜陽在孤塔。

汪日夢

山行

澗道散寒流，衡沙漫田畝。
妖狐行野碓，風葉滿春白。

盧澐

江上送別

潮生月亦上，月白見潮青。
不知潮月落，君去幾長亭。

西亭同朱近臣送沈嘉則口號

送君江上雨未及梅根渚雨急天欲昏不盡別時語

貧家吟

風雪下茆簷出門無去所淒淒兒女啼日晡猶未煮

訪友

訪友入南山扣門不聞語欲數青琅玕錯錯知幾許

偶成二首

江頭春水生江上春水長十日不出門魚苗大如掌

料頭不出門歲月已忘記
燕銜花片來知是春歸去

張祐

閒詠

池上新荷綠風清白鷺飛採蓮人已去
水面落紅衣

待柴荆

朝尋白雲去暮將白雲歸
寥寥窮巷中懸燈未掩扉

高爐

月明橋

何處月明橋花宮對浦潮即今明月夜時有客吹簫

黃鳳翔

山中

坐倚簷前樹卧聽石罅泉夢殘鶯喚醒衣袂足雲烟

雨後山行

步屨茂林下朝來新雨歇仰看碧霧流俯顧蒼苔滑
為愛嵐光好不辭衣履濕巖頭瀑布泉百道飛流急

張位

鳳冠山

苔積巖梯隱松深石洞開
雲山隨處好塵世幾人來

范謙

江行雜詠

遠樹搖山月空江接楚天
行當峯好處試與和鳴舷
西風吹白雲冉冉來江潏
急鳥入青冥忽作千家雨

蔡文範

寶應湖

湖濶疑無地堤長亘若虹孤舟數點雨殺却日南風

望白鶴嶺

百里初見近十里轉見遠絕頂不分明白雲時舒卷

顧大典

送王郡守之楚中

一曲芑溪水逢君又別君春風數行雁日暮隔湘雲

沈位

漁陽春望

二月春方半冷風日正長陌頭看柳色忘却在漁陽

方沆

秋汎

山合松楸晚沙寒橘柚秋坐看魚鳥近歷歷鏡中遊

馮時可

秋蟬

殘聲送秋風幽思含曉露集枯已自安何事螳螂妬

化之招飲城西得青字

落日輕風好扁舟送野亭近禾分水綠遠塔混山青

石亭秋夜

林影月中瘦雁聲天外寒徘徊傷往事愁思獨憑欄

宿普定

流雲隨雨到驚葉逐風輕一枕蝶成夢千山猿送聲

圮橋憶子房

偶語猶棄市一推何自全秦皇十日索不向圮橋邊

方廣寺夜宿

帶雨蟲深語搖風竹漫顛空山無遠夢支枕聽流泉

李應徵

浪口渡

柳風吹浪花谿雲澹無色偶此爭渡人日夕未遑息

烟霞洞

古洞鴉路深杳渺不知處忽見烟雲來疑從此中去

十八夜宿烟雨樓初見月

雨氣連朝夕湖雲濕未收今宵看月色始覺過中秋

林章

秋閨二首

秋月何娟娟一輪冰鏡冷人心照不見照見人孤影
秋雨何瀟瀟五更滴紅葉滴滴葉間紅可以比啼頰

秋思

不知秋何如花開盡清絕蘋花白於脂蓼花紅於血
不知秋何如鳴蟲先解意長聲擣衣篇短聲織錦字

送別

相送到江干，淒其風又雨。
淚下沾君衣，看君不能語。

孫繼皋

丙子春夢得一聯足成一絕

落日船頭浪，春風江上山。
家園幾千里，却向夢中還。

孫鑛

舟行

天陰村徑黑，渾迷舊時路。
忽逢岸上燈，照見橋邊樹。

馮琦

曹見素崔仲素遊南陽河上紀事

蒼崖環四塞曲徑幽篁裏渺渺疎林烟夕陽人渡水

恭陪聖駕步禱南郊紀盛

龍武新軍罷勾陳御路開紅塵都不掃留待雨師來

題萬玉山房

本是瀟湘人最愛瀟湘竹何處丘中琴歷歷瀟湘曲

鄒元標

夜遲丁右武江上

我向岸頭住君向田家宿
掀蓬望青天雞犬亂茅屋
題江右陽屏山石室

背倚芙蓉枕門看天馬峯
臨池無一事把盞對芙蓉
送甘義麓

秋風送爾去爾去幾時來
獨立江亭上長空一雁迴
馮夢禎

珠簾洞

帝遣銀河垂虛簾
蕩空綠我欲買娉婷
問爾乞三斛

王士性

老僧巖

苔衣深沒脰一定不知年從君問息機茫茫無始前

石梁洞

跨壑渾無地凌虛別有天誰能身似鶴縱步入蒼烟

魏允貞

岳陽樓

洞庭天下水岳陽天下樓誰為天下士飲酒樓上頭

顧紹芳

舟行即事

願得三千里飛帆一夜還
生憎衛河水十步九成灣

吳安國

江行

江樹浮疑沒江雲散復凝
疎燈明極浦處處有魚罾

馮大受

題王恒叔園居十詠

錄四首

夕陽塢

科頭不見人
茶烟逗深竹
擊石歌天風
落日在松屋

先月墩

寒潭明似鏡
秋半淨於埽
攜酒蕩蘭橈
月出林端早

卧雲坪

雖多泉石心
莫共老龍住
願以傳巖雲
化作商家雨

梧陰

庭際綠成陰
盡是梧桐影
徙倚月當空
夜深花露冷

余寅

雨中同司馬公游茂嶼

烟莽忽離離溪光蕩不持秋從何處到早已白蘋知

淮上阻風

大陂激風湍長淮五月寒客情無處住折取楝花看

揚于庭

水雲亭

空亭蘿薜深小徑莓苔互溪外郭熙山雲邊韋偃樹

雨後

客從前村來還向前村去只見溪上烟不見人歸處
亦是山中人
不識山中路昨夜柴門歸認知前村樹

秋興

栗里初栽菊東陵已種瓜白雲知不厭相就野人家

朱國祚

西勾橋口占

東雉村邊水西溝橋下流濯纓人不至處處浴沙鷗

裂帛湖上作

水淨一匹練山圍六扇屏春風纔幾日藥甲已先青

即景

秋風靡靡吹舟入蘆花裏相呼隔岸人聲墮半江水

逢破瓢道人吳少君

山人愛一瓢時時負肩背貽我巨勝花來自白羊隊

郭正域

廬山五老峯

湖中五老峯去天不盈尺澗底白雲生五老頭俱白

于若瀛

舟中雜興

兩岸山相似舟移曲不妨回看京口盡落照下丹陽

王時濟

登高丘

清林人跡稀我來何所翫坐看嶺上雲天風莫吹斷

朱長春

夜過鑑湖

鑑湖聞說好巖色照波間夜裏看烟際遙知蘭渚山

入山

山深石色古洞草無行迹何處有人家朝烟澗西白

方應選

戲次憲周韻

暫解山公事閒翻陶令書白衣人不到寧惜換銀魚

題陳叔真扇頭

前峯與後峯何處容吾屐
几坐小亭幽時聞空翠滴

湯顯祖

登獻花巖芙蓉閣

木末芙蓉出花巖
草樹齊陵高諸象北江白數峯西

南海浴日亭拜長至

孤臣遙浴日滄海
亦書雲願得扶桑影年年奉聖君

雁山迷路

借問采茶女烟霞路
幾重屏山遮不斷前面剪刀峯

廣陵偶題二首

歲月隨人去風塵可自如偶然流淚處翻著舊時書
忽忽知何意悠悠向此方怯知新涕淚還是舊衣裳

偶成

雁影金河盡梅花玉管催江南望春色獨上鳳凰臺

浪石灘

雨濕涇陽暮風鳴浪石寒鷓鴣飛不起橫過釣絲灘

觀回宿龍潭

是歲春連雪烟花思不堪雨中雙燕子今夕是江南

袁宗道

信陽道中即事

巉巖繞畛畦小逕通車馬即此是桃源問津何為者
四顧忽無逕僕夫何所往俄聞車馬喧疑在空中響
山下無人踪山上無鳥語惟餘一片雲見我來遊此
雲中忽吠鳴豈是劉安宅近看爨烟青人家枕山脊

天均洞

洞裡無人踪
洞外絕鳥語
獨有風濤聲
時出喬林裏

兩岸芙蓉

南垞與北垞
岸遠渺難即
此處好行舟
面面芙蓉色

袁宏道

虎丘

一片千人石
瑩晶若有神
劍光銷不盡
留與醉花人

袁中道

由草市至漢口
小河舟中襍詠

日暮黑雲生且依龍口住小舟裙作帆笑語過湖去
王龍嶼繡林江閣值雪雜詩

小樓枕石根波浪濺簷瓦遊客莫凭闌大江在其下
濃寒輟校書晨酒宿顏面隱几不成眠靜聽水石戰
皓然滿一洲洲畔千檣列不見舟中人但見舟上雪
賓從亦何喜水石亦何怒日暮絕來舟江心雙白鷺
玉泉山居

小閣枕鳴泉青松覆峻嶺刁刁一夜風泉聲在山頂

王嘉謨

西園遣興

長日掩柴門無復經行客
白雲媚春蘭紛紛落枕席

偶題

遠雨漸入林隨風吹客衣
殷勤問獨鳥何事宿還飛

橫溪遠棹

雲起石門山猿啼皖口樹
隱隱數帆輕不辨橫溪路

袁黃

卜居

結廬菰蒲中柴門映碧水蒹葭何蒼蒼兩岸秋風起

王一鳴

江上望飛雲洞

咫尺飛雲洞巉巖不可登江風吹落日時見出山僧

徐燾

送王玉生

作客生涯薄依人去住難春光無限好空向異鄉看

客中寒食

去歲燕山道今朝劒水濱如何兩寒食俱作異鄉人
漂母祠

落落千金報悠悠國士心從今慚漂母不敢過淮陰

陶望齡

戊戌除夜

淚燭黯將滅啼鳥耿未眠暗風吹濕夢夜雨忽連年

董其昌

登翠微亭

烟迷楊柳洲水拍芙蓉岬我憶南湖秋西山暮雲畔

題畫

近水晚逾碧遠山秋未黃夕陽寒滿地松影落衣裳

高攀龍

引泉

次第竹根瀉相將得到家鳥啼春雨後流出滿山花

陸彥章

雪

饑鳥噪不止浮光射簷隙獨客起開門夜雪深三尺

虎丘

石轉路不息幽源從此去滿地蓋松陰人影落何處

黃輝

巫山

陽臺花一片落盡楚宮春西家空作賦原是夢中人

別汝鈍

使者分歧路迢迢越五溪一為孤鳳唱無復冷猿啼

徐應簧

山中雜詠二首

流水看不厭汎兼溪上山倚闌終日坐紅葉擁柴關
欲訪南鄰居遙遙在何處隔浦見晴沙江村從此去

章士雅

春晚二首

春望亦堪憐平蕪遠接天不禁雙燕子飛出落花前

春雨過前溪垂楊樹樹低綠窻人不語惟有曉鶯啼

吳正志

讀書

端居披羣書時取適意上意盡擊節歌碧雲墮書几

區大相

端溪雜詠

夕陽下前山山光落溪水欸乃時一聞只在山光裡

望七星巖

仙山對城郭，累累七星石。中有太古文，世人不識。

鄭明選

早行

雞鳴客下牀，出門天未曙。山黑不見人，但聞馬蹄去。

新江營對雨

漠漠江雲生，江天雨如霧。東望白鷺洲，蒼茫不知處。

李日華

春日送徐同卿北上

青莎白鷺洲細雨桃花岬看乘春水船遙遙到天畔

題海湛畫卷

溪漁罷釣歸殘雪蓑上落暝色踏扁舟翩然似孤鶴

謝肇淛

宿吳山樓

佛火明還暗羈魂夢復驚秋風一夜起落葉與牕平

早行山中

驅車入雲烟連山齊雪色怪禽作鬼啼枯樹如人立

陳薦夫

舟中七夕

碧漢淹靈駕
神仙渡鵲橋
如何江上客
空對可憐宵

王思仕

旅燕

我來投驛店
君已宿茅梁
彼此同為客
誰先夢故鄉

湯賓尹

墨蓮花

擘結駕鳶勝雙棲玉井房紅衣翻不著獨自有波光

蔡復一

秋坐

夕照盡歸水秋聲半在林飛蟬過別樹未斷曳來音

夕陽

夕陽欲下山一半戀流水短笛牛羊歸餘光照童子

高承祚

聚首

人生聚首難離別何可久去日三春花今朝九秋柳

范允臨

有憶

井唾不復顧花飛難再攀江頭一片石應化女郎山

詠剪春羅

君恩宴曲池為郎製宮錦月落杏花寒裁縫剪刀冷

曹學佺

金陵雜詩二首

野草傍幽澗草長澗亦滿不知水流急但覺人步緩
朝出太平隄逶迤芳草齊楊花飄作絮觸面使人迷

松梯

身入蒼翠中落日無人影步步踏松根不覺到前嶺

呂克孝

過田叟

我欲驅黃犢移家傍屋東但容茅蓋頂先為築牛宮

查應光

澹碧軒

門開日影來一片蒼苔色花氣引遊人山風吹未息

顧起元

閨體

莫上翠樓看望見官城渡垂柳碧於蓼是郎去時路

董應舉

憩棲霞僧房

昔人卧亦遊吾今遊亦卧適來眠底山知從夢中過

徐良彥

舟夜

席邊即水底蓬外是霜天偶得寒更句孤舟燭不燃

黃汝亨

出長安劉抑之姚元素見別三絕

長安日以遠孤舟照單車莫忘別來意逢人數寄書
盡日逐車塵蕭疎送別人明知前路暮且復片時親
三年經一別幾見柳條黃莫灑西風淚相看鬢已霜

阮自華

送吳幼元之金陵

日夜大江流天邊到石頭莫愁湖九曲辛苦遲扁舟
春暮百花殘秦淮曉氣寒渡頭桃葉盡若為到長干
蘆葦壓春潮垂楊繫短舫東風猿唳苦明月夜蕭蕭

春行東郊道

歷歷眼中山依依原上柳何許最關情飛花重入手

飲詹生館中

映牖蕉若雲繞除松似織虛堂風雨生日日皆秋色

王嗣爽

九日聞范君材補官戲簡

龍山吹帽日北闕賜環新好飲黃花酒休令笑逐臣

舟中即事

黃河杳無際白浪卷山回不待窮源去方知天上來

王衡

湖堤

卷之十九
脉脉春沙淨纖纖暮雨齊吹花還擘柳綠盡短長堤
暖入酒暈重風動鞭梢輕馬嘶不盡處春郭柳條青

穀城

出山逢老人入山化黃石千載石人前紛紛拜行客

熊明遇

桃花

春歸南浦早淶水桃花塘灼灼紅烟裏金羈騎玉郎

劉宗周

辭崑崙叔招飲和來韻

此日舫齋興琴尊次第開誰當下塵榻道有徐孺來

徐禎稷

野岸夜步

野岸吹夕涼花香隔松影人自無閒心世豈乏清景

張鼎

題劉錦衣扇山居對僧話圖

結茅倚長松松濤散幽壑山僧何處來坐久松花落

花徑宿烟霞柴門來杖屨枳殼自春風芭蕉又春雨

凌漢翀

詠梅

玉蘂含風香苔枝帶霜冷夜靜月冥濛空庭卧無影

孫承宗

潮

休嫁弄潮兒潮今亦失信乘我油壁車去向錢塘問

李流芳

為陳維立題輞川畫

吾愛華子岡輞川流日夕如何舍此去傷心賦凝碧

程嘉燧

題畫柳扇別許康侯

五月金陵道行人畫柳條秋風來早晚腸斷白汀橋

谿堂小景

谿響到還散嵐光聚復空窓含過雲雨帆飽上灘風

靈隱夜歸

桑路沙中盡峯陰松杪多稻香明露葉谿雨颭風荷

絕句

遠樹春雲白晴洲落日香江南無限好畫出斷君腸

甘寧廟前古樹神鴉

回經捲雪樓神鴉啼不去記得泊舟時月明天欲曙

夜雨

江夜雨浪浪春風難禁當匡廬雲霧裡半月到潯陽

王翹草蟲冊四首

蝦

一片江湖心半生魚蝦侶還思見底清投罾富春渚

蟹

斷葦寒潮裡菰蔣作稻梁吳江楓落夜公子已無腸

蟬

秋雲搖曳時殘聲在高柳誰傳冷風姿知是承蜩手

絡緯

竹間流黃機明月與白露縑絲頭緒多經秋不成素

陳繼儒

山中雜咏

架上多異書屋角臨流水
蘆荻風蕭蕭秋聲淡如此
山中雪色猿子母嘗連肘
挂臂飲丹泉攀花釀仙酒

楊璉

寄老僧筇杖

堅輕筇竹杖一杖有九節
寄語朔州僧閒步秋山月

失題五首

錄四首

山色無定姿如烟復如黛中有素心人鳴琴應秋籟
閒適趁春遊倏然入深峭不見響屧人山花淡相笑
鬪草花茵中山花香撲鬢尋香不辨人嗅來蝶成陣
闕北鴻蒙荒真成羽人宅洪崖居可移天姥夢不得

鄒維璉

閨怨

妾恨憑誰寄君懷祇自知堂前雙燕子歲歲赴春期

陌上偶成

青青道傍柳轉眼忽成圍
男兒客他鄉不知歲月非

鍾惺

至巫山

不歷巫山曲焉知楚塞長
巴東行二日纔到古高唐

譚元春

為武陵姬秋水詠

有郎愛絃索北調久無傳
恨學江南曲聲聲帶可憐

陳翼飛

大湘灘

遮莫上瞿塘
濫瀕大如象
不見建溪石
連亘三千丈

甘露寺

山色乍有無
江光遞明滅
夕陽大道旁
行人讀殘碣

清湖舟中

枯柳霜中鵲
長烟雨後山
人來吹笛罷
獨立碧溪灣

落星石

白榆何夕墮
危石青如此
疑是酒星沉
渴飲湖中水

馬當

廟鼓持芭舞蠻歌日易斜分風能送客不忍打神鴉

赤欄湖

朝泛赤欄湖暮宿黃金浦多少采菱船來問襄陽估

武昌西門

郎採白蘋花儂開青箬酒夜宿武昌城朝折西門柳

朱大啓

經海印廢寺

我行海子橋不見鏡光閣惟有青蓮花涼風吹又落

自信州還貴溪

小艇恰容膝輕帆下溜灘忽聞津吏語斜月挂江干

楊嗣昌

登彭城

坎坎復簡簡撾鼓船樓頭憑樓一長嘯氣入洪河流
旭日明春濤晨風發清扇瞥爾呂梁洪飛湍去如箭

李衷純

雨後

夜靜空山中鳥鳴知雨歇寂寂啓寒霏林端澹疎月

李繼貞

落花吟

名花一辭蒂流浪那可保從他上綺筵寧似枝頭好
落花亦戀枝欲別更回首今日同枝花明朝知存否
掃花促雙鬟春深臂無力卧帚立香階清風自來拭

周順昌

詠梅

春半梅將盡中庭尚一枝玉人何處是惆悵月明時

吳伯與

春日

烟勢分嵐出波痕映林薄兀坐不逢人鄰花相對落

方孔炤

龍山行

百道雨奔雷石橋搖欲斷山雲足下開回頭不教看

萬景

登黃鶴樓

我欲乘黃鶴飄然物外遊
檻前懷古淚且為欄衡收
歸雲亭

著屐尋芳勝山花襲客衣
閒亭方小憩老衲帶雲歸
黃承昊

閒居夜雨二首

夜半蕭蕭竹輕寒枕上侵
明朝無別事風雨不關心

多少閒花草朝朝抱甕忙園丁今夜睡晏起亦何妨

顧錫疇

西湖

臨安宋故都荷花仍十里際曉湖光平鷓鴣鳴不已

蔡懋德

留別葛士倫叔

欲別似應別愛君未語君青山若送客容易起秋雲

顧大猷

蕪城

日落蕪城門草沒蕪城路無復鶴歸年時見烏棲樹

梅華閣

殘雪映江城春風度郊郭不見閣中人梅花自開落

朱茂時

鶴洲夜歸

秋月清於水孤舟放鶴歸不知荷葉露風卷上人衣

沈泰鴻

憶事

空山秋月明處處暮猿清不是愁腸斷還聞第四聲

王同軌

宮怨

永巷歲華鎖殘燈黯淡花間吹玉窗窸送月過窓紗

過山家

羣峯何岌岌繞屋風篁泣雲來亞地飛不雨林光濕

梅蕃祚

酬別二首

楚客怨青蘋吳儂愛紫萼扁舟難共載羞殺渡江人
一片秋林色如迎去客舟更憐江月好且為故人留

宋登春

襄陽懷古

襄陽白面兒慣唱銅鞮歌漢水東流去英雄可奈何

江上尋張鍊師

隔松聞桂杵玉粒搗玄霜水月明笙鶴江雲冷石堂

秋夜

天秋鴻雁來夜寒桂華落空館復相思清飈振葉薄

葉之芳

題江邊柳

揚子津邊柳秋風葉乍凋生當離別後不得長長條

柳應芳

和陳伯孺西湖十詠二首

偶向武陵遊曾于天竺佳明日欲離山晴霞故變雨

夜半高峯望微茫
海日光下方未覺
曉應是蔽扶桑

春閨

黃鶯不隻啼紫燕還雙
棲棲在妾梁上啼向妾
牕西

安紹芳

花津

水上春霞明花開幾千樹
不是避秦人人疑避秦處

一葦渡

夕陽下前溪西風吹野渡
不見折葦人獨立滄江暮

春盡日寄華公衡

惆悵春風暮懷人興轉孤夕陽空極目芳草隔南湖

李瑋

入圃

入圃細雨餘荷鋤情不惡山妻愛木綿慚余種紅藥

馮敏効

舟行

水遠連天碧秋深共客寒孤舟迷去路頻對夕陽看

孫文麓

逢鄉人

爾從山中來今喜江上遇我家老梅花開到第幾樹

黃克晦

題畫三首

江樹何霏微遙山蒼翠裡秋風吹裳衣人影橋下水
欲遡大江流泊舟楊柳岸潮上柳風吹渡江天未旦
江草引行路水風吹渡橋故人家咫尺門外是春潮

狼山歸道中作

前山無夕陽，猶問夕陽洞。
天寒人不行，山僧出相送。
太平水閣寫畫。

遠影亂歸帆，孤烟發殘磬。
垂綸岸岸移，楊柳遞相映。
胡宗仁

聞烏

烏聲誰喜聞，日啼白門樹。
愁來刪樹枝，認得白門路。

聞蛩

秋夜寒蛩語悽悽孤月明空牀自難寐不但百愁生

吳大經

江水

霞明江水淨潮落江帆急白鳥趁斜陽銜魚沙渚立

汪元范

詢李惟寅太保

已就通侯第新辭上將壇不知門下士若箇是任安

周良寅

夜泊始興江口

繫纜荒山下挑燈細雨前客心共流水搖蕩不成眠

汪功曹

樵舍

烟火隱茅茨數家傍山麓林深不見人丁丁聞伐木

吳宗儒

春夜錢塘江行

小艇發江干入夜東風起帶雨挂輕帆西行三百里

劉時中

有客

有客問烟蘿山家在何處笑指碧溪頭遙遙踏花去

錢允治

楚江秋晚

揚帆指洞庭忽憶君山柁日出清霜稀秋江月方墮

游及遠

野鹿園雜詠

潭水瀾其清芙蓉亂紅影白雁一聲秋蘆花明月冷

汝陽曉發

殘月挂高樹秋林生遠風淒涼千里色都入客心中

醉中辭竹軒宗侯

夜雨度花谿風花踏作泥惜花頻喚酒未得過城西

潘之恒

賦得千山紅樹送姚園客還閩

秋岸繁華景紅霞萬樹春西風無限意吹盡送歸人

落葉蕭蕭路秋風湖上波到家紅樹少不怨客愁多

吳夢暘

晚泊

老屋如巢居亦復禦風雨中有獨坐人焉知不可語

偶成

江上元無暑涼風暑盡收髣毛吹已短還度幾迴秋

臧懋循

集沈氏水亭餞送曹能始北上詩

相送江亭暮尊空客漸稀楊花不解別到處逐君飛

王野

送洪獻吉還真州

秣陵還泊岸瓜步又乘潮離情似新月明夜勝今宵

范汭

響屨廊

越艷迹如埽年年燒痕綠歸僧踏嶺雲枯葉聲相觸

贈楊孝父

清時有隱者自汲還自耘翳然茅屋上一片堯時雲

遊弁山

一峯際蒼蒼遐矚了無礙湖色上人顏崖陰落鳥背

送彥平游嶺南

九月羅浮道無衣亦不寒奇峯三十二直作夏雲看

曉發

春水動微茫帆前即異鄉雞聲殘月墮人語隔寒塘

秣陵送李茂才

一雨綠千里楚山如近人
留君君棹首何處秣陵春
荆南送姚百雉還莆中

自蜀經三楚由吳下七閩
到家君有日泥殺滯留人
盱江對月

新月出江干郵亭獨倚闌
別家如昨日二十一回看
吳鼎芳

空齋

空齋原寂寂落葉更蕭蕭
片月閒相照牀頭挂一瓢

閒雲

閒雲不作雨橫入峽山去峽口弄舟人家在雲歸處

吳兆

閒思寄林古度

一與西湖別春風兩度來曾棲山寺裏日日待花開

詠隔水美人

聞香憐袖動見影喜萍開若是桃葉渡待儂舟楫來

春雨

春從此中來還從此中去山客未眠時瀟瀟西林樹

月夜瓊河泛舟至鼓山謝耳目徐興公曹能始

林茂之共拈險韻十字刻燭成詩

錄三首

暝色初辭郭河流漸入江腥風何處度寒汐送漁艘
連日秋懷惡今宵有好懷秋江泛秋月若箇不言佳
三更月已落海氣雜山嵐鷗起歌衝岸龍驚火射潭

石沆

夢中吟

樹老何年寺山深此夜鐘一僧眉拄地教我學南宗

新春雜興

一囊置我琴一囊置我笛明月照寒江扁舟弔采石

董斯張

山中偶作

秋草長於人小鳥時出入但聞樵者歌不見行人跡

齊萊名

溪上

藤陰覆溪屋鉤簾遠岫青焚香淨石几小繭寫黃庭
薄暮牆之東小桑四五樹溪女踏青迴低頭不肯顧

吳沛

北窓

橫開二尺窓無風涼似水一編手未休高卧果何以

卓發之

夜過竹里館訪吳大有懷去病伯兄

山樓欲二更急雨忽淒清起視幽庭裡疎桐落葉聲

王龍起

客中晚春

葉老春將盡天寒雨未晴
離心何處切杜宇一聲聲

方登

秋晚

秋晚行堤上書聲在茅屋
月出不逢人風來弄修竹

張于壘

廬山看雲一絕句

溪中一片雲分作千林雨惟聞溪流聲不見溪流處



御選明詩卷九十九



總校官庶吉士臣侍朝

校對官編修臣莫瞻業

謄錄監生臣張槎

欽定四庫全書薈要

集部

御選明詩卷二百

詳校官原任主事_臣李斯咏

欽定四庫全書薈要卷一萬八千六百

集部

御選明詩卷一百

五言絕句五

鄭龍采

采松花

美人采松花紛紛落黃雪花落松枝輕當風更搖曳

張次仲

詠史

七首投銅柱金椎中副車吾謀適不遂天意竟何如

苔徑

苔徑路歌危幽人自來去但聞啼鳥聲不識鳥啼處

陳仁錫

中秋

月華冷于霜水白已成路宿鳥靜不鳴羽毛紛可數

九日

劍戟帶霜雪客星似水閒歌殘席已散秋葉滿空山

愁人未成眠
明月呼不起
一雁叫長天
睽孤亦如此

方逢年

乳洞口水碓

陟阿采玉芝
浮澗拾瑤草
野碓竟日春
誰識是龍腦

倪嘉慶

驟雨

雨驟泉聲急
雲涼樹色濃
不知何處寺
忽送一聲鐘

蕭士瑋

寓意

誅茆宜楚地無如廬阜美五步一溪雲十步一溪水

馮一第

野望

江岸閒行處晴雲澹一天微風生遠樹吹送渡頭船

月夜取惠泉烹茶

瓶貯冰雪性爐試蟹松聲手底商雲影香分月氣明

陸寶

周斗文自易水歸縱談燕太子及荆軻遺事慨然賦此

每讀燕丹傳長悲易水遙聽君談往事風起復蕭蕭
周應儀

爛溪二首

明月溪邊路秋風溪上船船頭何所有滿把水中蓮
我家爛溪邊出門即溪水秋來溪水深處處菱歌起

趙宦光

登華山

鳥道縈紆上深林幾折盤支公此銷夏五月晚猶寒

朱鷺

過曹氏園值玉蘭盛開

花光何璀璨八窓搖一色春風過酒人忻與花相值

徐弘澤

題畫贈李尚寶

風卷長蘆晚雲開積水明沙邊雙白鳥逐我釣船行

殷仲春

湖上岡

桑柘隱斜日獨登湖上岡誰人携小榼載酒出荻蔣

葛徵奇

題畫芙蓉

秋來烟水多蘆葦渺難即愛此江上花日坐雙鷗鷺

吳載鰲

姜給諫以五羊石見貽賦謝

文饒平泉莊有石自言好何如初平羊眠雲嚙瑶草

龔士驤

惜取

惜取檐前葉休教落地輕夜窓留聽雨葉葉是秋聲

王章

讀書篁川偶詠

竹裡起茶烟白雲堆滿屋何處桔槔聲園丁灌花木

王與楨

對瓶梅作

鄉思那可禁
況復逢驛使
念我欲歸時
已結垂垂子

王養正

對菊

仙人授錦囊
中有百年草
本是駐顏丹
人間不知寶

徐柏齡

江信寺文相國祠

孤嶼浮江面
寒潮撼石根
遙遙箕尾外
何處可招魂

顧咸正

上方巖

層層白雲堆石屋架其上鳥雀靜不喧半空人語響

堵肩錫

山路

入山處士住出山處士去深樹滿成陰不識家何處

蔡道憲

歲暮

美人無信至歲暮江梅白家住嶺西東何處寄相憶
馬踏夜城望南郊燈火疑為馮根公郭幼隗讀
書處

好月霜難下高城獨馬看遙憐山影外人在別燈寒
方以智

酒樓贈燕人

燕客善彈箏悲歌舊有名近來離別易不畏斷腸聲
高承埏

卧疾遣懷兼答親知見存

往事憑詩史新愁負酒徒故人音信斷何處覓柴胡

沈中柱

重九

川靜晴郊迴山明宿霧收空庭來返照惆悵一登樓

朱一是

濤溪

濤溪雖蕭條景物故鄉美春日對春山秋風蕩秋水

徐枋

懷友

細雨寒江路疎燈獨夜舟故山今寂寞為訪玉峯秋

張若羲

搗衣

馬上客衣單途中書信難別離秋易早階前露不乾
密網縈蛛絲一上一回遲羊腸九折坂君行已幾時
寂寞支磯石當階鳴促織輕羅穩稱身欲寄無消息

秋夜

新月上林端
林端白露溥
芭蕉不解意
葉葉向欄干
風來莫亂吹
搖我庭中樹
樹上有鳥棲
驚飛無住處

劉曙

詠蓮房

十三歲作

出水芙蓉色
娟娟不異花
療饑還療熱
菱芡不須誇

葛一龍

桃花源

一澗入蒼烟千花繞澗邊
花開與花落流水送流年

松墩

梵石亂無次高高積寒翠
一鶴懶應門每來松下睡

東園村

曾聞東園公住此不復出
年年開白花猶是漢時橋

偶作

山中春雪消澗底寒泉響
谷口無人行嶺頭明月上

張氏隱居

老卧空山裏窮交若箇存風吹春草長麋鹿到柴門

張廷立

賦得蛺蝶花上蛺蝶

飛飛復飛飛雙起復雙棲料得影相似怪他蜂亦迷

朱茂暉

虎山橋

霽雪東西崦寒雲上下沙何人吹玉笛早有落梅花

朱茂曙

秋曉

棲鴉樹杪啼促織籬根語不見
扣花人秋露濃如雨

鶴洲對酒

已收橋下釣復此石上酌
百尺凌霄花紛紛落紅萼

馮鼎位

題畫二首

遠水波澹澹平林煙漠漠
高閣置懸崖坐聽泉聲落
芳齋蔭隄柳古寺隔江村
日坐渾無事青山恰對門

題畫蘭

芳蘭在幽谷宛宛風前姿何處思公子湘江日暮時

登吹臺

樹杪涼颼起披襟獨倚樓落霞飛片片猶帶舊時秋

黃伋

題畫

秋霽愛登臨歷歷亭臯路不學米於菟模糊雨中樹

朱隗

月艇歸帆

入浦風漸微蒲帆不須落秋光何處多煙月溪邊閣

卜舜年

湖上送別

西風奮枯林潮沸盛湖晚淚眼對殘陽看君行漸遠

邵德生

夜度清遠峽

枕上不見山但聞水聲駛自非山百尋水急那如此

楓亭

草樹隨方別楓亭故有楓故鄉烏白樹霜色更深紅

邵濂

梳髮

髮白真堪惜蕭蕭可奈何西風吹病樹殘葉苦無多

李肇亨

西泠寓室

露氣橫疎柳香風送晚荷不知潮面闊止覺四山多

潘一桂

龍潭道中

疊嶂深藏日連峰共隱天
小舟如雁許厯厯下江川

施武

烏雅關

朝上烏雅關暮下烏雅關
老烏啼啞啞行人還未還

關索嶺

高嶺呼將軍將軍祀其上
行人仰望時白雲隔千丈

相見坡

上坡面在山下坡山在面相見令人愁不如不相見

屠應韶

贈歌童

弱質偏姚冶清歌意獨新未須聞別調梁上已飛塵

朱樵

落葉

綠葉影重重秋來逐轉蓬自無依樹力莫謾怨西風

木芙蓉

西風著岸吹木末發光彩
寄語有情人憑君涉江采
春暮苦雨

楊花池上飛燕子梁間語
從此送春歸能消幾番雨
繆師伋

九日

黃菊東籬下還逢九日開
今朝尊酒盡無復白衣來

陳鴻

題田家壁

十畝五畝園三株五株樹荷鋤日暮歸犬吠門前路

章志宗

間述

天無一片雲萬里清如水孤月自空明我心亦如此

吳孺子

江上

新月淡煙霏江花冷照衣無人山犬吠隔竹掩荆扉

閒居

積雨暗空林濕雲飛不起日暮鳥鵲喧幽人不得語

徐斗文

歸舟寄朱子蕃

春江自蜀來半是岷峨雪千里下江陵山山響鷓鴣

李廷昱

半山聞鶯

一路籃輿穩山行日欲西藤花開未盡隨處有黃鸝

言別

夜值芭蕉雨時當鄴杜秋匆匆無一語相視上孤舟

宗泐

題厓瀑圖

飛瀑灑寒冰危梁跨碧層天涯圖裏看頭白未歸僧

晚涼

晚涼池上亭坐來心似水雨過竹林青風吹豆花紫

山景

孤村帶寒鴉遠山涵夕霧渡頭人未歸落日風吹樹

水竹居圖

山人水竹居畫圖看更好十年不歸來茅屋秋風老

秋江送別

江頭楊柳樹秋雨更蕭蕭可惜長條盡那堪折短條

蓮社鐘

方深區內緣久負社中約惆悵暮鐘聲徘徊度林薄

梅花莊水軒望清遠不至

望君水軒西恨殺前村樹日暮溪雨來扁舟在何處

湘皋煙雨圖

翠袖湘江曲秋林淚點斑冥冥煙雨裏不見九疑山

次白以中西塘即景

落日雞鳴埭何人射雉回北湖山月上相送暮鐘來
來復

過越王臺

人道耶溪好青山罨畫開荷花三百里無數白鷗來

廷俊

題畫蘭

綠葉微風際清香
小雨餘湘江春水闊
愁殺楚三閭

德祥

故宮井

上有千尺桐下有千尺井
風吹井上桐零落井中影

題桃花小禽圖

簷外雨初晴幽禽四五聲
桃花無限思留客看清明

答香光居士

山北山南住雞聲隔一峰
新詩忽寄到猶勝一相逢
許起宗見過

雨氣來山北茶香過竹西
芙蓉花發處明日約扶藜
如蘭

題竹

一夜竹窻雨秋聲入夢聞
都將枝上淚灑徧九疑雲

雨澗牛

溪岸野橋橫烏犍帶犢行無人挂書讀雨外候春耕

道衍

題秋寺晚晴圖

猿將朔吹哀雲帶溪流駛相送獨歸僧蕭蕭夕陽寺

聞雁

鳴雁為離羣餘哀度水雲那知故鄉夜亦似客中聞

山中見王旼

身外留黃犢山中畊白雲不隨樵子去無路得尋君

淨倫

松陰小憩

風來石上松僧坐松下石洗鉢將煮茶溪流漾晴碧

古佛巖

蒼松蟠古巖洞門鎖幽谷但逢掃葉僧不見銜花鹿

明秀

西巖夏日

空盤春雨中筍味殊勝肉數日不窺園南風吹作竹

絕句

人坐秋樹下月在秋樹上
苦吟落葉空瘦影自相向

題墨山扇圖

遠嶼孤煙起林亭落日虛
青山半江影竹裏照殘書

普泰

韓亞卿德夫去官還陝

秋日泊沙灣君行早晚還
分違無限意流水不相關

文湛

春盡

斜陽穿樹林野屋臨溪水春盡不開門花落空山裏

江上

江頭落日明江上西風起歲歲芙蓉花開落秋水

法聚

江村

殘陽在木末遠鳥下孤嶼漁舟歸未歸吹笛芙蓉渚

宗林

春日

掃地心已淨讀書門嬾開
碧桃花落盡猶未覺春來

宗倫

旅懷

東吳隔千里歸計尚茫然
忽見梅花發他鄉又一年

洪恩

雨過即事

一雨山如沐垂藤覆深屋
不見踏花人窓外生新綠

德清

題畫小景三首

流雲覆春山輕寒凍欲坼何處踏青來歸時月華白
煙樹春雲綠江天落日紅不知何處醉歸向月明中
風雨孤舟夜微茫草樹春茅簷驚犬吠定是渡江人

再過小金山

漁火夜深白沙雞清晝喧江空人境絕長日掩柴門

法果

山居詩

四窓鳴磬聲一座春雲影千載寂無人六月猶嫌冷
昨接左溪書已成巖穴志著笠舉鋤頭學幹山中事
碧天寒已深晚露樹沾濕鳴蟬訴夕陽不道秋風急

智舷

秋日山中

落木空殿深夕陽下山徑澗戶松風寒獨夜鳴孤磬

天遂

間泛

無事亦波間孤舟覺自閒樹邊春霧斂尖露幾重山

圖映

宿蓮花閣

家山知遠近身卧與雲平數載未歸意一樓風雨聲

通凡

村居

竹間獨立時涼風自相接回顧碧池中蜻蜓踏萍葉

知證

閒居

香徑蘚花生陰檐藤葉綠日長不耐閒行溪看鷗浴

實訥

曉行

東林初日上羣壑開霽色樵夫先入山霜草見行迹

性琮

夜坐

新涼微月上雜坐小庭前莫更燒明燭飛蛾絕可憐

讀徹

入林

入林不知深但覺衣裳冷新綠滿空山低頭不見影

雜詩

天氣秋晚晴坐看西山色前溪有故人草深行不得

契靈

山居二首

屈曲山路長曾不見車馬鳥啼落日黃處處逢樵者
懸厓老樹枯樵斧不敢割亂挂猢猻藤不知幾千尺

明河

絕句

二月山容醒林端別有香心知春尚早蜂蝶一齊忙

山居詩五首

東溪信非遙咫尺籬門外橋頭看落花昨日鶯聲在
送雨風無力流花水不情啼春枝上鳥今日更分明

屋後山疎秀門前水清淺朝來何處風吹落浮雲片
塢深不見人樹杪青峰墮若箇採松花隔林應喚我
短日催身老長吟奈病何暗消心事盡新識藥名多

孟淑卿

題畫

嶺樹盤雲上溪迴路轉斜晚來煙靄合何處問山家
鄒賽貞

鷺鷥小景

聯拳屬玉兒飛向磯頭立秋寒雪不消點破江天碧

潘氏

重陽

獨坐小窓下幽蛩不絕鳴青天孤月靜滿耳是秋聲

秋月

園亭當水中兩岸蘆花雪夜深人未眠碧水蕩秋月

江上

江上水正平日照西江口遠樹一尺長岸闊風吹柳

蓮塘

溪水流東去垂楊對我門
淒涼斷橋路殘月照黃昏

馬間卿

暮秋

野色滿園中間情立晚風
菊花含雨艷楓葉醉霜紅

端淑卿

採蓮

風日正晴明荷花蔽洲渚
不見採蓮人只聞花下語

斗娘

送夫四絕句

錄二首

遠逐風塵路遺書滿目愁思君不成寐月上看牽牛
寂靜聞天籟愁眠恨夜遲遙憐江海別殘月夢君時

楊文儷

採蓮女

若耶採蓮女日出蕩輕橈慣識谿中路歌聲入畫橋

董少玉

憶別

憶別河橋柳青青送馬蹄妾心與羌笛無日不遼西
寄夫在奇嵐

流落客邊州刀環在馬頭莫憐楊柳色管取只封侯
周潔

秦淮

秣陵無處望灘水正前流何不教東下將心到石頭

夢還京

自去長干側終年桂嶺西
新秋望鄉處無奈白雲迷

憶父

憶昔當殘臘還家雪正飛
三年無一字不忍見鴻歸

朱德璉

偶題

偶聞淶水曲欲託黃金徽
絃手不相應心隨別鶴飛

袁九淑

閒居雜書示王孫

操杵力不任當爐心自鄙花時掩闥坐焚香讀秋水

張引元

賦得白裡白

鶴步瑤階淨螢飛星漢斜玉人褰素幙和月折梨花

林姪

詠鳳仙花

鳳鳥久不至花枝空復名何如學葵蕊開即向陽傾

尹紉佩

雨後江望

雨後水更明
秋風漸漸聲
寒天白露滿
江上曉煙橫

梅生

寄外

落葉滿庭階
秋風吹復起
遙憶別離人
寂寞何堪此

王氏

綵燕二首

方寸明光錦
閨中剪綴工
不須春社到
安坐粉香叢

貌得烏衣族春纖點艷粧時隨步搖影行坐共韶光

中秋後一日

宇碧淨秋煙清閨思渺然如何今夜月不似昨宵圓

黃淑德

客中聞子規

陌上柳條新逢春倍惜春忽聞啼杜宇愁殺未歸人

項蘭貞

寄慰寒山趙夫人

落葉驚秋早，斷鴻天際聞。
遙思鹿門侶，愁看嶺頭雲。

步月二首

步月下庭除，螢飛花影側。
露下不知寒，鳴蛩動秋色。
步月下庭除，青苔印鞋濕。
行吟月轉西，覓句還獨立。

秋夜

靜夜砧初動，涼風雨乍收。
一鉤新月上，應照故園樓。
舟中晚眺得青字

片帆天際闊，落日遠山青。
隱隱風前笛，行人不忍聽。

方孟式

春怨

隻影淡煙籠杜鵑枝上紅梨花風雨後人在月明中

方維儀

過石磯

巉石迴岸曲碧葉生秋樹朝朝欸乃聲不識江中路

北窓

香風吹入簾臺畔花如雪遙憶故鄉琴無聲對秋月

葉小鸞

春日曉粧

攬鏡曉風清
雙蛾豈畫成
簪花初欲罷
柳外正鶯聲

張倩倩

詠風

蕭蕭竹徑鳴
捲幔如有情
木落寒山裏
千林共一聲

沈華鬘

春日憶瓊章姊

粉蝶戲蘭叢桃花似面紅東風吹不定飛向玉階空

劉雲瓊

春閨

百舌五更啼啼聲驚繡闥王孫歸未得芳草自萋菲

項佩

社日

過雨春泥白斜飛燕尾纖恰停鍼綫坐自起為鉤簾

紀映淮

絕句

杏花一孤村流水數間屋夕陽不見人牯牛麥中宿

黃媛貞

聽雨

長夜一燈地獨愁誰與言牕前幾點雨井上芭蕉翻

吳靜婉

別思

西菴雨未收東菴風又作留住綠蓑衣莫與篙師著

趙燕如

荅人寄吳箋

感君寄吳箋箋上雙飛鵲但效鵲雙飛不效吳箋薄

徐翩翩

江陰送顧太學

一日發江口五日下午長洲可惜送君淚不隨江水流

趙彩姬

中秋對客

月從今夜滿秋向此時分莫惜金尊數清光喜共君
送王仲房還新安

暮雪江南路孤城尊酒期殷勤折楊柳還向去年枝
燕來

獨坐掩羅幃愁看雙燕飛思君不如燕一歲一來歸
朱無瑕

芭蕉雨

滴破愁中夢聽殘葉上聲新詩題未得偏送別離情

賦得霜上月

夜色涼如水霜華共月明誰招青女出來伴素娥行

鄭如英

留秋送劉冲倩

我欲留秋住寒衣不忍裁歸期何用速尚有小桃開

景翩翩

閨情四首

飛飛雙蛺蝶底事過鄰家鄰家海棠樹春來已見花

憶自折楊柳長亭贈玉驄如今楊花白日日解隨風
夜靜還未眠蛩吟遽難歇無那一片心說向雲間月
窓前六出花心與寒風折不是郎歸遲郎處無冰雪

與蘇生話別

十日平原酒三秋江上船一經搖落後明月幾回圓
月出人未來月缺人已去好共借餘輝相求直至曙

寫蘭二首

道是深林種還憐出谷香不因風力緊何以度瀟湘

但吹花信風莫作妒花雨我欲采瑤枝挽得同心住

風雨

風雨滯殘春豈但梨花悶夢裏萬重山疊起江南恨

三月即事

三月春無味楊花惹曉風莫行流水岸片片是殘紅

野外

曉雨泉聲響春山鶯亂啼流雲兩三片移過石橋西

周文

詠懷

幾點愁人淚不許秋風吹吹到長江裏江流無盡期
有懷二首

捲簾何所思獨立數歸鳥不恨落日遲惟憐君去早
醉罷見明月照我還照君如何君不見只見天邊雲

暮春四首

曾共看花發無端又落花春歸君亦去誰與惜年華
鳥聲泣暮雨蝶夢遶東風花落不堪問春光半已空

坐起愁如織空齋但寂寥不關風雨妬春色為誰凋
堪嗟分手日春色冷湖頭柳絮空飛盡長條轉繫愁

梁小玉

雜詠二首

松響翻清籟泉聲浣俗塵白雲堪贈客明月解留人
霜杵春清骨風燈颺夢思空山懸雨處斷浦落雲時

呼文如

以詩訂丘生前約

流水郎車馬垂楊妾髻絲春江他自好一一入相思

王微

別窓下蕉

窓外重重碧雨餘密密裁似知明日別不展寸心開

探梅

故人辭我去期我梅花時昨夜偶相念起看庭樹枝

怨梅

庭樹亦如昨故人來何時花花自蚤發偏爾獨開遲

代梅答

寄語問花人歲月那能借爾意怨遲開儂意憐遲謝

月夜留別馮夫人池上

愛君池下影特來池上眠落花映修竹靜起一簾煙

送遠

爾別何所遊月明江上舟異日思君處憑欄看水流

顧娟娟

贈別

南國相思子西番篤耨香留君充雜佩休賭紫羅囊

張叟

秋思

江上芙蓉開江上芙蓉謝開謝總秋風江流無日夜

屠生

題西子祠壁

紅粉溪邊石年年漾落花五湖煙水闊何處浣春紗

南靖老人

題壁

青青千里草隱隱獨家村日暮客投宿山深虎守門

吳下人

絕句

僕夫不識路踟躕道傍久寒風吹衣襟落日照馬首

無名氏

贈老僧

南潯祇園寺詩

清溪通笠澤地以水為鄉竹青三日雨僧白一頭霜

僊人洞

以下五首見
昌平州志

石洞窅且深花落無人埽仙翁去不還何處尋瑤草

虎谷

虎谷名金山客行初未識日午山下過人面黃金色

銀山

銀山本在北萬丈青雲梯曉見居庸雪銀山忽在西

龍泉

瀾瀾山下泉滌洄白如玉清以濯吾纓濁以濯吾足

安濟橋

石梁跨飛虹水清魚可數莫謂非通津亦有江南估

題西山清凉寺壁

見長安
可游記

山僧汲空潭驚起二龍子百里雲冥濛三日雨不止

題西山水盡頭

見青鞵
踏雪志

雙流泱泱鳴石根失其一棄糠於此中應從玉泉出

小水人

壁上詩六首

錄四首

妾住小水邊君住青山下
青年不可再白日坐成夜
薄情君拋棄咫尺萬里遠
一夜月空明芭蕉心不展
解下羅裙帶無情對有情
不知妾意重只道妾身輕
月色照羅衣永夜不得寐
莫打五更鐘打得人心碎

冬橘

秋夜吟

幽蛩響寒砌白露墮寒石
獨立看月明不覺羅衣濕

莆田女鬼

別梁生

側側復力力與君長歎息出入自苦愁單情還相憶

楔遜

山雨

一夜山中雨風吹屋上茅不知溪水長祇覺釣船高

鄭夢周

偶題

赤葉明村徑清泉漱竹根地偏車馬少山氣自黃昏

李穡

瀼浦弄月

日落沙猶白雲移水更清
高人弄明月只欠紫鸞笙

李詹

雜詠

舍後桑枝嫩畦西薤葉稠
陂塘春水滿稚子解撐舟

成石磷

送人之金剛山

一萬二千峰高低自不同君看日輪上何處最先紅

李希輔

次唐修撰夜宿太平館醉起韻

雄辭海生波醉墨鴉翻壁無使我公歸於馬作佳客

蘓世讓

太平館次韻

望眼山連北歸心月向西羈魂與別恨愁殺五更雞

沈彥光

太平館次韻

春鳥花邊啼暮鴉樹頭宿何事遠游人不秉良宵燭

申光漢

暮景

樹密深濃翠孤煙淡作雲前村聞犬吠暗路艸中分

崔壽城

驢江

日暮滄江上天寒水自波孤舟宜早泊風浪夜應多

鄭礪

聞笛

迢迢沙上人初疑雙白鷺忽聞橫笛音寥亮江天暮

姜克誠

湖堂早起

江日晚未生蒼茫十里霧但聞柔櫓聲不見舟行處

金淨

村舍

水鄉豐德郡蕭寺遠浮煙地迴村燈近天垂水氣連

趙媛妾李氏

登樓

小白梅逾耿深青竹更妍憑欄未忍下為待月華圓

許景樊

效崔國輔

妾有黃金釵嫁時為首飾今日贈君行千里長相憶
春雨暗西池輕寒襲羅幕愁倚小屏風牆頭杏花落

雜詩


精金明月珠贈君為雜佩不惜棄道旁莫結新人帶

天祥

長安春日作

長安客春來思易迷樂游原上草無日不萋萋

御選明詩卷一百



總校官庶吉士臣侍朝

校對官編修臣莫瞻菴

謄錄監生臣張槎